

## KPDNHEP Pulau Pinang rampas 14 bungkus gula-gula Ghost Smoke

SYALMIZI HAMID

30 Julai 2019 2:33 PM



Gula-gula Ghost Smoke yang dirampas dalam serbuan di sebuah kedai runcit di Bukit Mertajam, Seberang Perai semalam.

**GEORGE TOWN** - Sebanyak 14 bungkus gula-gula Ghost Smoke Cool Fruit Powder dirampas Pejabat Kementerian Perdagangan Dalam Negeri dan Hal Ehwal Pengguna (KPDNHEP) negeri ketika memeriksa sebuah kedai runcit di Bukit Tengah, Bukit Mertajam dekat sini semalam.

Rampasan berkenaan dibuat semasa empat pegawai penguat kuasa KPDNHEP daerah Seberang Perai Tengah menjalankan pemeriksaan ke atas premis-premis perniagaan di sekitar daerah itu kira-kira pukul 10 pagi.

Ketua Pegawai Penguatkuasa KPDNHEP negeri, Chin Ching Chung berkata, produk berkenaan disyaki menggunakan perihal dagangan palsu dan meragukan.

"Hasil pemeriksaan mendapati premis menjual barangan runcit itu ada menjual gula-gula Ghost Smoke Cool Fruit Powder.

"Sebanyak 14 bungkus gula-gula tersebut termasuk dokumen berkaitan seperti invois belian telah disita untuk tujuan siasatan," katanya dalam kenyataan di sini hari ini.

Beliau berkata, kes itu disiasat mengikut Seksyen 5(1)(b) Akta Perihal Dagangan 2011.

Menurut Ching Chung lagi, pihaknya setakat ini telah menjalankan sebanyak 59 pemeriksaan bagi mengesan penjualan produk itu di peringkat pemborong dan peruncit serta penjaja di kawasan sekolah di seluruh negeri. - K! ONLINE